

述

異

記

任
昉
撰

中
華
書
局

BW71/1197/1007

叢書集成初編所選
稗海漢魏叢書龍威
祕書皆收有此書漢
魏爲明代本故據以
排印

述異記卷上

梁樂安任昉著 安義王軼奉校

昔盤古氏之死也。頭爲四岳。日爲日月。脂膏爲江海。毛髮爲草木。秦漢間俗說。盤古氏頭爲東岳。腹爲中岳。左臂爲南岳。右臂爲北岳。足爲西岳。先儒說。盤古氏泣爲江河。氣爲風。聲爲雷。目爲龍。古說。盤古氏喜爲晴。怒爲陰。吳楚間說。盤古氏夫妻陰陽之始也。今南海有盤古氏墓。冢三百餘里。俗云。後人追葬盤古之魂也。桂林有盤古氏廟。今人祀祀。

南海中盤古國。今人皆以盤古爲姓。昉按盤古氏。天地萬物之祖也。然則生物始於盤古。

南海小虞山中有鬼母。能產天地鬼。一產十鬼。朝產之。暮食之。今蒼梧有鬼姑神是也。虎頭龍足。鱗目蛟眉。蛟眉。蛟龍目也。今吳越間防風廟。土木作其形。龍首牛耳。連眉一目。

昔禹會塗山。執玉帛者萬國。防風氏後至。禹誅之。其長三丈。其骨頭專車。今南中民有姓防風氏。卽其後也。皆長大。越俗祭防風神。奏防風古樂。截竹長三尺。吹之如嗚。三人披髮而舞。

軒轅之初立也。有蚩尤氏兄弟七十二人。銅頭鐵額。食鐵石。軒轅誅之於涿鹿之野。蚩尤能作雲霧。涿鹿今在冀州。有蚩尤神。俗云。人身牛蹄。四目六手。今冀州人掘地得髑髏如銅鐵者。卽蚩尤之骨也。今有蚩尤齒長二寸。堅不可碎。秦漢間說。蚩尤氏耳鬚如劍戟。頭有角。與軒轅鬪。以角抵人。人不能向。今冀州有

樂名蚩尤戲。其民兩兩三三，頭戴牛角而相觸。漢造角觝戲，蓋其遺製也。

太原村落間祭蚩尤神，不用牛頭。今冀州有蚩尤川，卽涿鹿之野。漢武時，太原有蚩尤神畫，見龜足蛇首，首疫，其俗遂爲立祠。

堯使鯀治洪水，不勝其任，遂誅鯀於羽山，化爲黃能。反來入於羽泉，今會稽祭禹廟，不用熊。曰黃能卽黃熊也。陸居曰熊，水居曰能。防按，今江淮中有魃名熊，熊地之精，至冬化爲雉，至夏復爲蛇，今吳中不食雉，海故也。

揚州有鮫市，市人鬻珠玉而雜貨鮫布。鮫人卽泉先也，又名泉客。

南海出蛟綃紗，泉先潛織，一名龍紗，其價百餘金，以爲服，入水不濡。

南海有龍綃宮，泉先織綃之處，綃有白如霜者。

鬱林郡有珊瑚市。海先市珊瑚樹碧色，生海底，一株十枝，枝間無葉，大者高五六尺，至小者尺餘。鮫人云，海上有珊瑚宮，漢元封二年，鬱林郡獻珊瑚。

光武時，南海獻珊瑚婦人，帝命植於殿前，謂之女珊瑚。一旦柯葉甚茂，至靈帝時，樹死，咸以謂漢室將亡之徵也。

凡珠有龍珠、龍所吐者，地珠、地所吐者，南海俗諺云，地珠千枚，不及玫瑰。言地珠賤也。玫瑰亦是地珠也。越人諺云，種千畝木奴，不如一龍珠。

越俗以珠爲上寶。生女謂之珠娘。生男謂之珠兒。吳越間俗說。明珠一斛。貴如玉者。合浦有珠市。昔炎帝女溺死東海中。化爲精衛。其名自呼。每銜西山木石填東海。偶海燕而生子。生雌狀如精衛。生雄如海燕。今東海精衛誓水處。曾溺於此川。誓不飲其水。一名烏誓。一名冤禽。又名志鳥。俗呼帝女雀。東海島龍川。穆天子養八駿處也。島中有草名龍芻。馬食之。一日千里。古語云。一株龍芻。化爲龍駒。陶唐之世。越裳國獻千歲神龜。方三尺餘。背上有文。皆科斗書。記開闢已來。帝命錄之。謂之龜曆。伏滔述帝功德。銘曰。胡書龜曆之文。

夏桀宮中有女子化爲龍。不可近。俄而復爲婦人。甚麗而食人。桀命爲蛟妾。告桀吉凶。

桀時泰山山走石泣。先儒說。桀之將亡。泰山三日泣。今泰山山石遠望之。若人泣者是也。武王謂周公曰。桀爲不道。走山泣石。

堯爲仁君。一日十瑞。宮中芻化爲禾。鳳凰止於庭。神龍見於宮沼。曆草生階。宮禽五色鳥。化白。神木生遠。薹蒲生廚。景星耀於天。甘露降於地。是爲十瑞。

東海畔有孤竹焉。斬而復生。中有管。周武王時。孤竹之國獻瑞筍一株。

空桑。生大野山中。爲琴瑟之最者。空桑也。

周成王元年。貝多國人獻舞雀。周公命返之。

南海中有軒轅丘。鸞自歌。鳳自舞。古云天帝樂也。

崆峒山中有堯碑禹碣。皆籀文焉。伏滔述帝功德。銘曰。堯碑禹碣。歷古不昧。

會稽山有虞舜巡狩臺。臺下有望陵祠。帝舜南巡。葬於九疑。民思之。立祠曰望陵祠。

帝舜都郭門。古宮存焉。宮前有堯臺舜館。銘記古文。莫有識者。

湘水去岸三十里許。有相思宮。望帝臺。昔舜南巡而葬於蒼梧之野。堯之二女娥皇、女英。追之不及。相與慟哭。淚下沾竹。竹文上爲之斑斑然。

昔戰國時。魏國苦秦之難。有以民從征。戍秦久不返。妻思而卒。既葬。塚上生木。枝葉皆向夫所在而傾。因名相思木。今秦道間有相思草。狀如石竹。而節節相續。一名斷腸草。又名愁婦草。亦名繡草。人呼爲寡婦莎。蓋相思之流也。

江南有懶婦魚。俗云。昔楊氏家婦爲姑所溺而死。化爲魚焉。其脂膏可燃燈燭。以之照鳴琴博弈。則爛然有光。及照紡績。則不復明焉。

水虺五百年化爲蛟。蛟千年化爲龍。龍五百年爲角龍。千年爲應龍。

沮洳二水。波紋皆若五色。彼人多文章。故一名積水。

瀟灑之間。離別亭。古送別處。漢河會流處。岸上有石。銘云。下至水府。三十一里。皆傳云。李斯刻此石。

鹿千年化爲蒼。又五百年化爲白。又五百年化爲玄。漢成帝時。中山人得玄鹿。烹而視之。骨皆黑色。仙者說玄鹿爲脯。食之。壽二千歲。

餘干縣有白鹿。土人皆傳千年矣。晉成帝遣人捕得。有牌在角後。書云。漢元鼎二年。臨江所獻白鹿。淮水中。黃雀。至秋化爲蛤。春復爲黃雀。雀五百年化爲蜃蛤。

梓樹之精化爲青羊。生百年而紅。五百年而黃。又五百年而色蒼。又五百年而色白。

龜千年生毛。龜壽五千年。謂之神龜。萬年曰靈龜。

海魚千歲爲劍魚。一名琵琶魚。形如琵琶而善鳴。因以名焉。

漢中山有虎生角。道家云。虎千年則牙蛻而角生。

漢宣城郡守封邵。一旦忽化爲虎。食郡民。民呼之曰封使君。因去不復來。故時人語曰。無作封使君。生不治民死食民。夫人無德而壽。則爲虎。虎不食人。人化虎則食人。蓋恥其類而惡之。

獾之爲獸。狀如虎豹而小。始生還食其母。故曰身獾。

濟陽山有麻姑登仙處。俗說山上千年金雞鳴。玉犬吠。

闔閭夫人墓中。周迴八里。別館洞房。迤邐相屬。漆燈照爛。如日月焉。尤異者。金蚕玉燕。各千餘雙。

吳王夫差築姑蘇之臺。三年乃成。周旋詰屈。橫亘五里。崇飾土木。殫耗人力。宮妓數千人。上別立春宵宮。爲長夜之飲。造千石酒鍾。夫差作天池。池中造青龍舟。舟中盛陳妓樂。日與西施爲水嬉。吳王於宮中作海靈館。館娃閣。銅溝玉檻。宮之樓檻。珠玉飾之。

吳既滅越。棲勾踐於會稽之上。地方千里。勾踐得范蠡之謀。乃示民以耕桑。延四方之士。作臺於外。而館

賢士今會稽山有越王臺。今交州麻林一名紵林。勾踐種麻。將以弦弓。交州據頭山。勾踐貯米於其上。春積糠爲山。今會稽之上。有越王鑄劍洲。箭鏃洲。往往有得古箭鏃。蓋古制也。

廣州東界有大夫文種之墓。墓下有石爲華表柱。石鶴一隻。種卽越王勾踐之謀臣也。

洞庭湖中有釣洲。昔范蠡乘扁舟至此。遇風。止釣於洲上。刻石記焉。有一陂。陂中有范蠡魚。昔范蠡釣得大魚烹食之。小者放於陂中。陂邊有范蠡石牀。石硯。鉗鱗。范蠡宅在湖中。多桑紵英果。有海杏大如拳。苦菜。甘柚林。石壁上鑿兵書十篇。菰葑川皆范蠡手植之。定陶有范蠡千斛魚陂。木桃園。酸棗林。梧桐宮在句容縣。傳云。吳別館有楸梧成林焉。梧子可食。古樂府云。梧宮秋吳王愁。是也。

閩閩墓中石銘云。吳王之夜室也。嗚呼。平吾君。○乘吾之邦。遷于重崗。維崗之陽。吾王之邦。

今宜都有吳王射亭。木棠苑。木棠果名。似梨而甜。宜都七里溪。吳王射堂。堂之柱礎。皆如伏龜。袁宏官賦曰。海龜之礎。是也。

蒼頡墓。在北海。呼爲藏書臺。周末發冢。得方玉石。上刻文八十字。當時莫識。遂藏之書府。至秦時。李斯識八字。云上。天作命。皇辟迭王。至叔孫通。識十二字。

湘鄉石堂。有老子篆書道德經五千字。蔡邕於其旁以練書證之。

番禺有酸柿甜梅。李尤果賦。生物賦。偏梅甜柿酸。

漢章帝三年。子母笄生白虎殿前。時謂爲孝竹。羣臣獻孝竹頌。

越多橘柚園。越人歲多橘稅。謂橙橘戶。吳書闕尚表請除臣之橘籍是也。

越中有王氏之橘園。胡氏之梅山。賀氏之瓜丘。吳中有陸家白蓮。顧家斑竹。趙有韓氏之酸棗。

中山有楸戶。掌楸木者。楸子爲竹器。漢書貨殖志。千年楸。

鄆鄆有故宮。基存焉。中有趙王之果園。梅李至冬而花。春得而食。

鄆中銅廳鄉。魏武帝陵下。銅廳石犬各二。古詩云。石犬不可吠。銅廳徒爾爲。

一說。香水在并州。其水香潔。浴之去病。吳故宮亦有香水溪。俗云。西施浴處。人呼爲脂粉塘。吳王宮人灌

漚於此溪上源。至今馨香。古詩云。安得香水泉。灑鄆衣上塵。俗說魏武帝陵中亦有泉。謂之香水。

饒州俗傳。軒轅氏鑄鏡於湖邊。今有軒轅磨鏡石。石上常潔。不生蔓草。

桂林東南。蘆海有裸川。桓譚新論云。呈衣冠於裸川。海上有裸人鄉。

月陽大姑陵。陵下有石麟二枚。不知年代。傳云。秦漢間公卿墓。則以石麒麟鎮之。

庾氏縣有盧君古塚。塚旁柏二株。枝條蔭茂。二百餘步。樹文隱起。皆知龜甲。根動如銅石。

盧府君墓。在館陶縣南二十里。不知何代。銘曰。盧府君歸真之室。

盧陵郡有董氏之宅。前有董家祠。昔有董氏語其鄉人曰。吾嘗畫室作神。及死。家人老幼皆卒。鄉人往往

見之。稱吾於地下作盧陵侯。鄉人因爲立祠。能致風雨。

安定西隴道。其谷中有彈箏之聲。行人過聞之。謂之彈箏谷。

粉水出房陵永清谷。取其水以漬粉，卽鮮潔有異於常，謂之粉水。

漢水西山有九井，井中常出五色煙，高數丈。傳云昔有人縫入，得數斛空青。

西海外有鵠國人，長七寸，日行千里，百獸不犯。惟畏海鵠，鵠見必吞之。在鵠腹中不死，鵠一舉亦千里。

吐綬鳥，其身大如鷄，五色，出巴東山中。毛色可愛，若天晴淑景，卽吐綬，長一尺，須臾還吞之。陰滯卽不吐。

陽泉，在天餘山北，清流數十步，所涵草木，皆化爲石，精明堅勁。其水所經之處，物皆漬爲石。

却塵犀，海獸也。然其角辟塵，置之於座，塵埃不入。

羊山上有燃石，其色黃而文理疏，以水沃之，便如煎沸。其上可炊烹，稍冷卽復以水沃之。

獬廌，獸中最大者。龍頭，馬尾，虎爪，長四百尺，善走。以人爲食。遇有道君卽隱藏，無道君卽出食人。疑乙入反，猶真

反乳

辟寒香，丹丹國所出。漢武時入貢，每至大寒，於室焚之，暖氣翕然自外而入，人皆減衣。

迷穀，出招鶴搖山，亦名鷓山。其樹如穀，又如楮，其花四照，名曰迷穀，如佩之，令人不迷。

南康博都縣西，沿江有石室，名夢口穴。嘗有船人遇一人，通身黃衣，擔兩籠黃瓜，求寄載。過至崖下，此人

唾盤上，徑下崖，直入石穴中。船主初甚忿之，見其人入石穴，始知異。視盤上唾，悉是金矣。

嗜參養母至孝，曾有玄鶴爲戎人所射，窮而歸參，參收養療治，瘡愈放之。後鶴夜到門外，參秉燭視鶴，雌

雄雙至，各銜明月珠以置參家。

炎洲在南海中，上有風生獸，似豹，青色，大如狸，網取之，積薪數車燒之，不燃，鐵錘鍛頭數十下，乃死，以口向風，須臾便活，以石上葛蒲塞鼻，即其死，取其腦和菊花服之，可壽五百歲。

南方有災火山，四月生火，十二月火滅，火滅之後，草木皆生枝條，至火生，草木葉落，如中國寒時也，取此木以爲薪，燃之不燼，以其皮積之爲火浣布。

蘭陵山有井，異鳥巢其中，金翅而身黑，此鳥見即大水，井不可窺，窺者益歲輒死。

玉門西南有一國，國中有山石磻，子林切千枚，名爲霹靂磻，從春雷而磻滅，至秋磻盡，雷收復生，年年如此。

宜城蓋山有舒姑泉，俗傳有舒氏女，與父析薪，女坐泉處，忽杳挽不動，父遽告家，及再至其地，惟見清泉，湛然，其母曰：「女好音樂，乃作弦歌，泉乃涌流。」

搗衣山一名靈山，在瑯琊郡，山南絕險，巖有方石，昔有神女於此搗衣，其石明瑩，謂之玉女搗練石。

斗鄉西津有玉女岡，天常雨，輒先涌五色氣於石間，俗謂玉女披衣。

嶽川去玉門三千里，地寒多雪，著木石之上，皆融而甘，可以爲菜，嶽丘靈丘。

八方之荒有石鼓，其徑千里，撞之其音即成雷也，天之申威於此。

秦始皇作石橋於海上，欲過海觀日出處，有神人驅石去不速，神人鞭之，皆流血，今石橋其色猶赤。

員嶠山名遠丘，東有雲石，廣五百里，有竊長七寸，黑色有鱗角，以雪霜覆之，然後作齒，長一尺，其色五采，織爲文錦，入水不濡。

園客者，濟陰人，貌美，邑人多欲妻之。客終不娶，常種五色香草，積十餘年，服食其實，忽有五色蛾，集香草上，客薦之以布，生華露焉。至罽時，有一女自來，助養蠶，以香草食之，得繭一百二十枚，繭大如瓊，每一繭繅六七日，絲方盡，繭訖，此女與客俱神仙去。

并州妬女泉，婦人不得飽，粧綵服至其地，必興雲雨，一云是介推妹。

齊桓公北征孤竹，見人長尺，具衣冠，左袂而走於馬前，管仲曰：「此山之神也，名曰侖兒，竊王去聲之君與，則見也。」

和州歷陽淪爲湖，昔有書生遇一老姥，姥待之厚，生謂姥曰：「此縣門石龜眼血出，此地當陷爲湖。」姥數往視之，門吏問姥，姥具答之，吏以朱點龜眼，姥見之，遂走上北山，顧城遂陷焉。今湖中有明府魚、奴魚、婢魚，信安郡有石室山，晉時王質伐木至，見童子數人，蒸而歌，質因聽之，童子以一物與質，如棗核，質含之，不覺饑，俄童子謂曰：「何不去？」質起視斧柯盡爛，既歸，無復時人。

螺亭，在南康郡，昔有一女採螺爲業，曾宿此亭，夜聞空中風雨聲，乃見衆螺張口而至，使亂噉其肉，明日惟有骨存焉，故號此亭爲螺亭。

北方有七尺之聚，南方有三尺之梨，凡人不得見，或見而食之，卽爲地仙。

荀瓊，字叔偉，潛棲卽粧，嘗東遊，憩江夏黃鶴樓上，望西南有物飄然，降自霄漢，俄頃已至，乃駕鶴之賓也。鶴止戶側，仙者就席，羽衣虹裳，賓主歡對，已而辭去，跨鶴騰空，眇然而滅。

晉安郡有一書生謝端。爲性介潔。不染聲色。嘗於海岸觀濤。得一大螺。大如一石米斛。剖之。中有美女。曰子天。漢中白水素女。天帝矜卿純正。令爲君作婦。端以爲妖。呵責遣之。女嘆息升雲而去。

東陽郡永康縣。吳時有人入山。逢大龜。擲之。未至家。遇夜。覆舟於岸。見老桑呼龜曰。元緒。汝當死矣。龜呼桑樹曰。子明無苦也。雖然。盡南山之楸。不能潰我。對曰。諸葛恪明敏。禍必及於子。明日。其人將龜獻吳王。命煮之。三日三夜不死。遂問諸葛恪。恪曰。此龜有精。須得多載老桑爲薪。煮之立爛。遂令以老桑斫之爲薪。既燃卽爛。

漢武帝幸甘泉長平阪。道中有蟲。赤如肝。頭目口齒悉具。人莫知也。時東方朔曰。此古秦獄地也。積憂所致。上使按圖。果秦獄地。朔曰。夫積憂者得酒而解。乃取蟲置酒中。立消。

洞庭山有宮五門。東通林屋。西達峨眉。南接羅浮。北連岱岳。東有石樓。樓下兩石。扣之清越。所謂神鉦。昔有青童。乘燭。隨飛輪之車至此。其跡存焉。上有天帝壇。山有金牛穴。吳孫權時。令人掘金。金化爲牛。走上山。其跡存焉。故號爲金牛穴。

范文。本日南奴也。爲奴時。牧羊於湖中。得兩鯉魚。欲私食之。郎知詰之。文詐云。將購石還。非魚也。郎至魚所。果見兩石。文異之。石有鐵文。因入山中。咸治作兩刀。因舉刀向郛。郛卽壽中山地名也。咒曰。鯉魚變化。治成刀。斫石郵破者。是有神靈。文當治此國。遂斫破之。衆遂推爲君。

宋武帝徵時。伐荻於新洲。見一大地。長數丈。遂射之。傷。明日復往觀之。聞杵臼聲。視見數青衣童子。搗藥。

問其故。答曰：我王爲劉寄奴所射，今合藥傳之。帝曰：何神也？童子不答。帝叱之，皆散。收得藥，人因名此草爲劉寄奴。

西域有鼠國，大者如豬，中者如兔，小者如常鼠，頭悉白，商賈有經過其國者，若不祈祀，則嚼人衣裳。周成王時，東夷送六角牛。

磅磳山，去扶桑五萬里，日所不及，其地甚寒，有桃樹千園，萬年一實。一說：日本國有金桃，其實重一斤，委子闔閭葬於吳縣三月，有白虎居其上，號曰虎丘。

晉太康中，會稽縣蟛蜞及羊皆化爲鼠，蟛始變者，有毛而無肉，大食新稻。

周穆王時，天下連雨三月，穆王乃吹笛，其雨遂止。

漢武帝時，西方有日支國，口獻活人草三莖，有人死者，將草覆面，卽活之矣。

封微山中有怒毛獸，若不噴，毛短三寸，若噴，毛長三尺。

南金山有獅子禽，其毛黃赤而光鮮，耳小，若鳴時，地動石裂。

崑崙山有玉桃，光明洞澈而堅瑩，須以玉井泉洗之，便軟可食。

北方荒外有石湖，方十里，中有橫公魚，夜卽化爲人，刺之不入，煮之不死，若以烏梅二七箇煮之，卽熟，可治邪病。

東海郡尉于台，有杏一株，花雜五色，六出，號云仙人杏。

晉時晉陵薛願家。有虹飲釜中水。須臾而竭。願因以酒祝而益之。虹復飲盡。吐金滿釜而去。願家遂至大富。

顧渚山有報春鳥。春至則鳴。秋分亦鳴。似題鳩之類也。

龍肝瓜長一尺。花紅葉素。生於冰谷。所謂冰谷素葉之瓜。

越俗說。會稽山夏禹廟中。有梅梁。忽一春而生枝葉。

漢成帝常與趙飛燕游太液池。以沙棠木爲舟。其木出崑崙山。人食其實。入水不溺。詩曰。安得沙棠木。列以爲舟船。

巴東有真香茗。其花白色。如薔薇。煎服令人不眠。能誦無忘。

同湖鵝湖水上則鳴。孫綽望海賦曰。石鷄清響而應潮是也。

聚窟洲有返魂樹。伐其根心。於玉釜中煮。取汁。又熬之。令可丸。名曰驚精香。或名震靈丸。或名反生香。或名卻死香。死尸在地。聞氣即活。

岑華山在西海之西。有蔓竹。爲簫管吹之。若華風之鳴。

魏興錫巖山。多生微蘆草。有風不偃。無風獨搖。

黃金山有楠樹。一年東邊榮。西邊枯。後年西邊榮。東邊枯。年年如此。張華云。交讓樹也。

石勒嘗備於臨水。爲遊軍所囚。會有羣鹿傍道。軍人競逐之。勒乃獲免。俄而又見一老父。謂勒曰。向來事

鹿者我也。君應爲列國主，故相救耳。

大食王國在南海中，有一方石，石上多樹，棘藜葉青，枝上纏生小兒，長六七寸，見人皆笑，動其手足，頭著樹枝，使摘一枝，小兒便死。

獬豸者，一角之羊也。性知人有罪，皋陶治獄，其罪疑者，令羊觸之。

取鳥之未生毛者，以丹和牛肉使吞，至長，羽毛皆赤，殺之，陰乾，杵服，壽五百歲。

鄧通以權船爲黃頭郎，曰土勝水，其色黃，故刺船郎皆著黃帽。

漢元和元年大雨，有一青龍墮於宮中，帝命烹之，賜羣臣龍羹，各一杯，故李尤七命曰：味兼龍羹。案消山有石樓樹，吳太皇元年，郡吏伍曜於海際得之，枝莖紫色，有光，南越謂之石連理也。

南海有明珠，卽鯨魚目，鯨死而目皆無精，夜可以照，謂之夜光。

千年木精爲青牛。

猿五百歲化爲獾，獾千歲化爲老人。

鶴生五百年而紅，五百年而黃，又五百年而蒼，又五百年而白，壽三千歲。

鸞千年生胡鬚。

虎魚老者爲蛟。

江中魚化爲鱉，而食五穀者，百歲爲鼠。

蛟羊似羊而無角。啖之毒。

古人說羊一名胡髯郎。又名青鳥。

周穆王之犬。日走千里。食虎豹。

閩閩構水精宮。尤極珍怪。皆出自水府。

瀨鄉老子祠有紫石榴。紅標李。一李二色。

勾漏縣有白橘。青椒。標杏。

南中生子母竹。今之慈竹也。

漢章帝元年。上虞縣獻二蒂瓜。一實二蒂。及玉色橘。

趙王故城俗呼爲麋鹿城。

殷紂時。六龜生毛而兔生角。是兵甲將興之兆。

梁孝王築平臺。臺至今存。有兼葭洲。鳧藻洲。梳洗潭。中有望秦山。商人望鄉之處。

貝宮夫人廟。在太一山下。云懷元王夫人也。廟卽其基也。

當陽南有龍川。風川。云漢武帝時八龍五鳳常見於此。亦呼爲五鳳州。

魏文帝甄后陵。在鄴中臨漳東北。至今有甄后神。



述異記卷下

周幽王時，牛化爲虎，羊化爲狼，洛南有避狼城。云幽王時，羣羊爲狼食，人故築城避之。今洛中有狼村，是其處也。

關中有金魚神，云周平二年，十旬不雨，遣祭天神，俄而生涌泉，金魚躍出而雨降。

楚莊王時，宮人一旦化爲野蛾飛去。

秦始皇帝至東海，海神捧珠獻於帝前，今海畔有秦皇受珠臺。

東海上有蒲葦，秦始皇至此葦下，築蒲擊馬，蒲至今榮籽。

始皇二十六年，童謠云：阿房阿房亡始皇。

古說：雍州雨魚，長八尺許。

先儒說：夏禹時，天雨金三日，古詩云：安得天雨金，使金賤如土，是也。

周成王時，咸陽雨金，今咸陽有雨金原。

王莽時，未央宮中雨五銖錢，既而至地，悉爲龜兒。

漢世，翁仲儒家貧力作，居渭川，一旦天雨金十斛於其家。

漢惠帝二年，宮中雨黃金黑錫。

呂后三年秦中大雨粟。

漢宣帝時江淮饑饉人相食天雨穀三日秦魏地麥亡穀二十頃。

漢武帝時廣陽縣雨麥。

河間有雨鉛城漢世天雨鉛錫於此。

周時咸陽雨錢終日而絕。

秦二世元年宮中雨金既而頃刻皆化爲石。

漢成帝末年宮中雨一蒼鹿殺而食之其味甚美。

大禹時天雨稻古詩云安得天雨稻飼我天下民。

漢世潁川民家雨金銖錢。

魏武帝末年鄴中雨五色石。

吳桓王時金陵雨五穀於貧民家富者則不雨。

魏時河間王子元家雨中有小兒八九枚墮於庭前長六七寸許自言家在河東南爲風所飄而至於君

庭與之言甚有所知如史傳所述。

魏世河內冬雨蛩。

蒼蠶說周秦間河南雨酸蛩遂生野蛩今酸蛩縣是也。

魏文帝安陽殿前。天降朱李八枚。啖一枚。數日不食。今李標有安陽李。大而甘者。卽其種也。

漢末楊氏家園中產神奈三株。

武陵源在吳中山。無他木。叢生桃李。俗呼爲桃李源。源上有石洞。洞中有乳水。世傳秦末喪亂。吳中人於此避難。食桃李實者。皆得仙。

杜陵有金李。李大之者謂之夏李。尤小者呼爲鼠李桃。之大者謂之木桃。詩云。投我以木桃。是也。

防陵定山有朱仲李。圓三十六所。潘岳閒居賦云。防陵朱仲之李。李尤果賦云。三十六園朱李。是也。山中有標李。大如拳者。呼仙李。李尤果賦曰。如拳之李。陸士衡果賦曰。中山之標李。又云。仙李標而神李紅。豫章之爲木。生七年而後與衆木有異。

□□□寶鼎元年。立豫章宮於昆明池中。作豫章水殿。

袁紹在冀州時。滿市黃金而無斗粟。餓者相食。人爲之語曰。虎豹之口。不茹饑人。劉備在荊州時。粟與金同價。

永嘉之亂。洛中饑荒。懷帝遣人觀市。珠玉金銀。闐委市中。而無粟麥。袁宏表云。田畝由是丘墟。都市化爲珠玉。是也。

漢末大饑。江淮間童謠云。太岳如市。人死如林。持金易粟。貴於黃金。洛中童謠曰。雖有千黃金。無如我斗粟。斗粟自可飽。千金何所直。

善莠說。桓靈之世。汝穎間桑麻爲蒿莠。桃李不實。花而復落落。而復花。而官倉有朽粟。晉永嘉中。梁州雨七旬。麥化爲飛蛾。

晉末。荊州久雨。粟化爲蠶。蠶害民。春秋云。穀之飛爲蠶是也。中郎王羲與袁奏曰。臣聞堯生神禾。而晉有蠶粟。陛下自以聖德何如。帝有慙色。

宋高祖之初年。當晉末饑饉之後。卽位以來。江表二千餘里。野粟生焉。

古說。淮南諸山石生穀。袁安云。石穀。藥名。穗之尤小者。

漢世古諺曰。雖有神藥。不如少年。雖有珠玉。不如金錢。

太原神釜。岡中有神農嘗藥之鼎存焉。

咸陽山中有神農辨藥處。一名神農原。藥草山。山上紫陽觀。世傳神農於此辨百藥。中有千年龍腦。

冀州鵝山。傳龍千年則於山中蛻骨。今有龍岡。岡中出龍腦是也。

今藥中有禹餘糧者。世傳昔禹治水。棄其所餘糧於江中。生爲藥也。

仙藥紫鳳腦。千年燭髓是也。

龜甲香。卽桂香之善者。

紫鹿香。一名紅蘭香。一名金桂香。亦名麝香草。出蒼梧桂林二郡界。今吳中有麝香草。似紅蘭而甚芳香。南海山出千步香。佩之香聞於千步也。今海峽有千步草。是其種也。葉似杜若而紅碧間雜。賈籍曰。南郡

買千步香。

日南有香市，商人交易諸香處。

漢雍仲子進南海香物，拜爲涪陽尉，時謂之香尉。

日南有千畝林，名香出其中。

香洲在朱崖郡，洲中出諸異香，往往不知名焉。千年松，香聞於十里，亦謂之十里香。

杏園洲在南海中，洲中多杏。海上人云：仙人種杏處。漢時嘗有人舟行遇風，泊此洲五六日，食杏故免死。

云洲中別有冬杏。

木蘭川在潯陽江中，多木蘭樹。昔吳王闔閭植木蘭於此，用構宮殿也。七里洲中有魯班刻木蘭爲舟，

至今在洲中。詩家云木蘭舟出於此。

天姥山南峯，昔魯班刻木爲鶴，一飛七百里，後放於北山西峯上。漢武帝使人往取之，遂飛上南峯，往往

天將雨，則翼翅動搖，若將飛奮。

魯班刻石爲禹九州圖，今在洛城石室山。

東北巖海畔有大石龜，俗云魯班所作。夏則入海，冬復止於山上。陸機詩云：石龜尚懷海，我事忘故鄉。

上虞縣有石龜步，水際謂之步。

瓜步在吳中，吳人賣瓜於江畔，用以名焉。

吳江中又有魚步、龜步。湘中有豔妃步。昉按吳楚間謂浦爲步。語之訛耳。

公主山在華山中。漢末王莽秉政。南陽公主避亂奔入此峯。學道後得昇仙。至今嶺上有一雙朱履。傳云公主既於山中得道。駢馬王咸追之不及。故留二履以示之。潘安仁有公主峯記。

晉永嘉亂。既已至江。諸公主不得隨去。安陽公主奔入兩河界。悉爲民家妻。常快快不悅。有故鄉之思。村民感之。共築一臺以居之。謂之公主望鄉之館。至今巋然。王朗懷舊賦云。將軍出塞之臺。公主望鄉之館。漢成帝遣將軍王濟戍邊。及帝崩。王莽篡逆。濟與莽有隙。遂留不敢歸。因逃入胡中。士卒相率築臺爲望鄉之處。

曲阜縣南十里。有孔子春秋臺。曲阜古城有顏回墓。墓上有楠樹二株。可三四十圍。土人云。顏回手植。晉末。華盜蜂起。護陽公主自洛中出奔至洛南。士卒二千餘人留守不去。以衛京都。劉曜攻破之。主有殊色。曜將逼之。主手刃曜不中。遂自刃。曜奇其節。遣葬之。封護陽公主。隣民憐之。爲立廟。今護陽神是也。苻堅既爲姚萇所殺於新平佛寺中。後寺主摩訶闍常夢堅曰。可爲吾作宮。既而寺左右民家死疫相繼。巫者常見堅怒曰。吾不宮。將盡殺新平民。因其改寺爲廟。遂無復災疾。每年正月二日。民競祀以太平新平寺。今苻家神也。

今烏江長亭。亭下有駐馬塘。卽當時烏江亭長鱸舟待項王處。

今陰陵故城九曲澤。澤中有項王村。卽項籍迷失路處。項王失路於澤中。周回九曲。後人因以爲澤名。

燕昭王爲郭隗築臺，今在幽州燕王故城中，土人呼爲賢士臺，亦謂之招賢臺。

漢武帝於湖中牧馬處，至今野草皆有嚼嚙之狀，湖中名爲馬澤，澤中有武帝彈碁方石，石上勒銘存焉。

葳蕤草，一名麗草，又呼爲女草，江浙中呼爲娃草，美女曰娃，故以爲名。

懸腸草，一名思子蔓，南中呼爲離別草。

苦草，謂之澤葵，又名重錢，亦呼爲宜蘇，南人呼爲斬草。

萱草，一名紫萱，又呼爲忘憂草，吳中書生呼爲療愁花，嵇中散養生論云：萱草忘憂。

桂林有睡草，見之則令人睡，一名醉草，亦呼爲懶婦簾，出海南地記。

楚中有宮人草，狀如金盞而甚氤氳，花色紅翠，俗說楚靈王時，宮人數千，皆多怨曠，有囚死於宮中者，葬之後墓上悉生此花。

舜草，今之孝草也。

蕭萋，一名塞路，生北方胡地，古詩云：千里蕭萋草。

莢葵，本胡中葵，似葵而大者。

紅蘭花，一名大草。

寡草，特生而不叢。

洛陽有芝蒿園，漢官儀云：染園出芝蒿，供染御服，是其處也。

紅綬花、蔓生如綬，有文采，因名焉。

甘泉宮有木園，武帝時園也。今俗呼爲仙草園。出漢魏宮志。

蔓園在定陵。漢官儀曰：蔓園供染綠紋綬。小藍曰蔓。蔓青

芙蓉縣在洛陽，漢家置之。

長沙定王故宮有夢園，真定王故園也。

張騫首指園，今在洛中，首指本胡中菜也。張騫始於西戎得之。

衛有淇園出竹，在淇水之上。詩云：瞻彼淇澳，綠竹猗猗。是也。

梧桐園在吳宮，本吳王夫差舊園也。一名鳴琴川。

南中有楓子鬼，楓木之老者爲人形，亦呼爲靈楓焉。

後漢季子長爲政，欲得囚情，以梧桐木爲囚像，穿地爲坎，臥木囚於其中，視之，正蹕者不動，寃者木囚動出，時以爲情誠所應。子長時爲大理卿。

漢武宴於未央宮，忽聞人語云：老臣負□訴，不見其形，良久見架上一老翁，長八九寸，面皺鬚白，拄杖僂步至前。帝問曰：叟何姓名，所訴者何？翁緣柱放杖，叩首不言。因仰視屋，俯視帝脚，忽不見。帝駭懼，問東方朔，朔曰：其名爲藟，兼水木之精也。陛下頃來頻興宮室，斬伐其居，故來訴耳。仰頭看屋而後視陛下脚者，願陛下宮室足於此，不欲更造。帝乃息役。後帝幸瓠子河，聞水底有鼓歌之聲，畫看騰芬芳於帝前，前梁

上翁及數年少，綠衣素帶，佩纓皆長八寸，一人最長，長尺餘，凌波而出，衣不沾濕，或挾樂器，帝問之曰：向所聞樂，是公等奏耶？對曰：臣前味死歸，訴蒙陛下息斤斧，得全其居，故相慶樂耳。遂奏樂，獻帝謂穴珠一枚，遂隱不見。帝問方朔，何謂洞穴珠？朔曰：河底有一穴，深數百丈，中有赤蚌，蚌生此珠，徑寸，明耀絕世矣。帝寶愛此珠，置於內庫。

燕昭王種長春樹，葉如蓮花，樹身似桂樹，花隨四時之色，春生碧花，春盡則落，夏生紅花，夏末則凋，秋生白花，秋殘則萎，冬生絮花，遇雪則謝，故號爲長春樹。

澄水泉，在滄州九視山，山下出泉，闊百餘步，亦名流水渠，雖泛金石終不沉，故州人欲渡此泉，以瓦鐵爲船舫。

地生毛，京房以爲人勞之應，北齊武成河清年中，徐州及長安地生毛，長七尺，時北築長城，內築三臺，人苦勞役之應也。

神泉出高密琅琊郡，人或禱祈求之，則飛泉湧出，清冷而味甘，人或汗之，則便渴。

鹽田，在河東郡，有一大澤，澤中產鹽，引水沃之，則自成，號曰鹽田，取之無盡，不沃則無也，又鹽液有鹽池，自然生鹽，其鹽多少，隨月增減。

甜溪水，其味如蜜，東方朔得以獻武帝，帝乃投於陰井中，井水遂甜而寒，洗浴則肌理柔滑。

日林國有神藥數千種，其西南有石鏡，方數百里，光明瑩徹，可鑒五臟六腑，亦名仙人鏡，國中人有疾，

輒照其形。遂知病起何處。即採神藥餌之。無不愈。其國人壽三千歲。亦有長生者。列禦寇。鄭人。御風而行。常以立春日歸於八方。立秋日遊於風穴。是風至即草木皆生。去則草木皆落。謂之離合風。

秦繆公時。陳倉人掘地得物。若羊非羊。似豬非豬。繆公道中逢二童子。云此名蠃。史記作蟪。在地中食死人

腸。若以柏木穿其首則死。故今種柏在墓中。以防其害也。
辰州嵩溪有丹青樹。枝葉直上。籠雲。下無枝條。上有五色葉。圓如華蓋。故號爲丹青樹。俗謂之五采樹。今在辰陽縣。

城陽縣城南有堯慶都墓。廟前一池。魚頭間有印文。謂之印頰魚。若非祀者。捕而不得。

奇肱國。其國人機巧。能爲飛車。從風遠行。湯時。西風吹奇肱人乘車東至豫州界。後十年而風復至。使遣歸國。去玉門四萬里。

東海有牛魚。其形如牛。海人採捕。剝其皮懸之。潮水至則尾起。潮水落則尾伏。

顧渚山有櫛。汝賦反。子樹。其木如玉色。渚人採之以爲杖。

她一首兩身者。名曰肥遺。西華山中有也。見則大旱。

南海有水蟲。名曰筴。蚌蛤之類也。其小蟹大如榆筴。筴開甲食。則蟹亦出食。筴合甲。蟹亦還入。爲筴取食。以終始。生死不相離。

西蜀石門山有樹名曰栲栳。皮裏出屑如麵。用作餅食之。與麵相似。因謂之栲栳麵焉。

漢武帝元鼎元年。起招靈閣。有一神女。留一玉釵與帝。以賜趙婕妤。至昭帝元鳳中。宮人見此釵。光燦甚異。共謀欲碎之。明視釵匣。唯見白燕直升天去。後宮人常作玉釵。因名玉燕釵。

三國時。昆明國貢魏瀾金鳥。鳥形如雀。色常翔海上。吐金屑如粟。至冬。此鳥即長霜雪。魏帝乃起溫室以處之。名曰辟寒臺。故謂吐此金爲辟寒金也。

周昭王時。塗修國獻青鳳。丹雘。各一雌一雄。

吳郡魚城。城下水中有石首魚。至秋化爲鳧。鳧項中尙有石。

南康郡有君山。高秀重疊。有類臺樹。名曰女媧宮。有獸名格。似猩猩之形。自知吉凶。人無機愛之。則可馴狎。欲執害之。則去不來。

桂陽郡有銀井。鑿之轉深。漢有村人。焦先。於半道見三老。獨身皓白。云。逐我太苦。今往他所。先知是怪。以刀斫之三翁。各以杖受刀。忽不見。視其斷杖。是銀。其井後遂不生銀也。

儋耳郡明山。有二石如人形。云昔有兄弟二人。向海捕魚。因化爲石。因號兄弟石。

貞山在昆陵郡。梁時。有村人韓文秀。見一鹿。產一女子在地。遂收養之。及長。與凡女有異。遂爲女冠。梁武帝爲別立一觀。號曰鹿娘。後死入棺。武帝致祭。開棺視之。但聞異香。不見骸骨。蓋尸解耳。遂葬棺於昆陵。因號其葬處爲貞山。

江陰北有子英廟。子英卽野人也。善入水捕魚。得一赤鯉。將著家池中養之。後長徑一丈。有角翅。謂子英曰。我迎汝身。汝上我背。遂昇於天。爲神仙。晉時人。

瓊瑤似小蚌。有一小蟹在腹中。瑤出求食。故淮海之人呼爲蟹奴。

鶴鬣故解反。刺氈。德毛反。耳響則聽遠。眼赤則眇遠。大毛落。叢毛生。其色如雪。又云高脚疎節。則多跛也。若百

六十年變止。不食生物。千六百年形定。飲而不食。與鳳爲羣。

松有兩鬣。三鬣七鬣者。皆如馬鬣形也。言粒者非矣。

人間三十六洞天。知名者十耳。餘二十六天。出九微志。不行於世也。

鯉魚滿三百六十鱗。蛟龍輒率而飛去。一年置一神守之。則不能去矣。神則龜也。

王僧辨嘗爲荆南得橘一蒂三十子。以獻梁元帝。

吳太皇時。朱休之家犬歌曰。言我不能歌。聽我歌梅花。今年故復可。明年當奈何。休遂殺其犬。明年休家人並死。

哀牢夷。西蜀國名也。其先有婦人捕魚水中。觸沉木。育生男子十人。沉木爲龍。出水上。九男驚走。一兒不去。龍因舐之。後諸兒推爲哀牢王。

涿光山下。澗水多鱖。鱖之魚如鵝而千翼。捕之可以禦火。

吳桓王時。會稽生五色瓜。今吳中有五色瓜。歲充貢獻。

東南有桃都山。上有大樹，名曰桃都枝，相去三千里。上有天雞，日初出照此木，天雞即鳴。天下雞皆隨鳴之。

合塗國，去王都七萬里。人善服鳥獸，雞犬皆使能言。

林屋洞有左神幽虛之天，即天后真君之便闕。中有白紫芝泉，皆此洞所出。乃神仙之飲餌，非常人所能得之。

日南郡出果下牛，高三尺。漢樂浪郡有果下馬，並高三尺。

廬陵有木客鳥，大如鵲，千百爲羣，不與衆鳥相廁。俗云是古之木客化作。廬陵，即今吉州也。

後魏孝昌年中有洛子淵，自云洛中人，戍於彭城。同營人樊元寶還，子淵附書至洛，書上題云：宅在靈臺，南延洛水，既至洛，忽逢一老翁曰：吾兒書也。引入門館，甚盛，呼坐命酒，酒至，色赤甚香美。寶告退，老翁出送，但見高岸對水，無復人家。及還彭城，子淵已失。元寶與子淵同戍三年，不知是水神也。

彭城郡古徐國也。昔徐君宮人生一大卵，棄於野。徐有犬名后倉，啣歸溫之卵，開內有一兒，有筋而無骨。後爲徐君，號曰偃王，爲政而行仁義。

湘州栖霞谷，昔有橋順二子於此得仙。服飛龍一九十年不饑。故魏文詩曰：西山有仙童，不飲亦不食。即此也。

河間郡有聖姑祠，姑姓赫，字女君。魏青龍二年四月十日，與隣女樵采於澗，澗深二水處，忽有數婦人

從水而出。若今之青衣。至女君前曰。東海使聘爲婦。故遣相迎。因敷茵於水上。請女君於上坐。青衣侍側。順流而下。其家大小奔到岸側。惟泣望而已。女君怡然曰。今幸得爲水仙。願勿憂。儻聽風起而沒於水中。鄉人因爲立祠。又置東海公像於聖姑側。呼爲姑夫。

大翻山。小翻山。在嬌州。昔有王次仲。年少入學。而家遠常先到。其師怪之。謂其不歸。使人候之。又實歸。在其家。同學者常見仲捉一小木。長三尺餘。至則著屋間。欲共取之。輒尋不見。及年弱冠。變蒼顏。齋書爲錄。書秦始皇遣使徵之。不至。始皇怒。檻車囚之。赴關。路次化爲大鳥。出車而飛去。至西山。乃落二翻。一大一小。遂名其落處爲大小翻山。嬌州。卽今幽薊之地。

利州義成郡葭萌縣有玉女房。蓋是一大石穴也。昔有玉女入此石穴。前有竹數莖。下有青石壇。每因風自掃此壇。玉女每遇明月夜。卽出於壇上。閒步徘徊。復入此房。

龍巢山下有丹水。水中有丹魚。欲捕其魚。伺魚之浮出水。有赤光如火網。取割其血塗足。可涉水如履平地。

宋武帝大明五年。廣郡獻白孔雀以爲中瑞。

秦惠王獻五美女於蜀王。王遣五丁迎女。乃見大地入山穴中。五丁曳她。山崩。五女上山。遂化爲石。一說。少室山有貝多樹。與桀木有異。一年三放花。其花白色香美。俗云。漢世野人將子種於此。

武都丈夫化爲女子。顏色美麗。蓋山之精也。蜀王娶以爲妻。無幾物故。遂葬於成都。郭中以石鏡一枚。徑

二丈，高五尺，同葬之。

衡州九疑山有舜廟，郡守至官，常致敬修祀，則空中如有弦歌之聲。一說，九疑山隔湘江，跨蒼梧野，連營道縣界，九山相似，行者望之有疑，因名曰九疑山。

漢惠帝七年夏雷震南山，林木皆自火，燧至根，其地悉皆燠黃，後其雨迅過，人就其間，得龍骨一具。

晉世顏含嫂病，須與蟪蝥脂療之，則愈。既不能得，含憂嘆累日，忽有一童子，持青囊授含，乃曰：「冥地脂也。」童子遂化爲青鳥飛去。

陽羨縣小吏吳龜，家在溪南，偶一日有掘頭船過水，溪內忽見一五色浮石龜，遂取歸，置於床頭。至夜，化爲一女子，至曙仍是石，後復投於本溪。

南海中有蛟人室，水居如魚，不廢機械，其眼泣則出珠。晉木玄虛海賦云：「天琛水怪，蛟人之室。」興安縣水邊有平石，其上有石櫛石履各一具，俗云：「越王渡溪，脫履墮櫛於此。」

荊州清溪，秀壁諸山山洞，往往有乳窟，窟中多玉泉，交流中有白蝙蝠，大如鷗，按仙經云：「蝙蝠一名仙鼠，千歲之後，體白如銀，捷卽倒懸，蓋飲乳水而長生也。」

夜郎縣者，西南遠夷國名也。其先有女子浣紗，忽見三節竹流入足間，聞其中有號聲，剖竹視之，得一男，歸而養之，及長，有武略，自立爲夜郎侯，以竹爲姓。漢武帝元鼎六年征西南夷，改爲牂牁郡，夜郎侯迎降，天子賜以玉印綬，後卒，夷僚咸以竹王，非血氣所生，衆爲立廟，今夜郎縣有竹王神，是也。

識

右任昉述異記二卷。晁氏云。昉家藏書三萬卷。天監中。采輯前世之事。纂述新異爲此記。晉時所未聞。特以資後來屬文之用。亦博物之意。唐志以爲祖冲所作。非也。今考隋唐志。並載祖冲之述異記十卷。無任昉記。而藝文類聚。太平御覽等書。所引祖記。又往往爲今本任記所無。無妨任祖二人當時各自有記。而隋唐志或偶失載也。南史本傳亦載昉撰雜傳二百四十七卷。不及此記。豈即在雜傳中歟。今叢書本較稗海本又不全。中多唐時州名。則此書又經唐人改竄非原本也。故上王讀識。